

四庫全書

集部

欽定四庫全書

集部

西河集卷一百五十三至六

詳校官編修臣曹城

助教臣常循覆勘

總校官庶吉士臣倉聖脉

校對官主事臣李廷敬

謄錄監生臣吳朝綸

欽定四庫全書

西河集卷一百五十三

翰林院檢討毛奇齡撰

排律

送周儀曹奉使安南冊弔一十四韻

星使頒雙節春官駕一軺

恩綸綏異域冊弔出中朝嶺嶠飛蘭旆關樓見柳條賜

麟金作繡坐馬王岳條銅鼓迎山驛香船渡海潮宅居

義仲古地拓季聲遙瘴薄開泓渰風炎近沃焦國王行  
饗重蠻女拂塵嬌靈祝陳方譯神歌引洞簫饌盛瓊海  
貝酒縮荔江蕉奠幣霜鋪紙傾珠泪織綃還朝酬浩蕩  
歸路記招搖沛國華文在都鄉舊蹟超他時歌四訖誰  
敢後南徼

賦得拈花如自生觀內家所製翦綵花作

何事深閨巧能傳舊苑名花從心裏發香傍指頭生柳  
線非搓就荷衣豈織成春風吹不定曉蝶撲還驚散蘂

聞多氣飛絲絆有情翻嫌枝葉上裁剪費經營

上寶坻相公

坐論安公府平章啟

聖朝開疆逾漢鼎致

主並唐堯殿借山為棟樞隨斗建构身紆丞相紱世挿  
侍中貂宅俊區三事班行絕百僚才名張道濟器識李  
文饒金筋籌還直彤弓賜轉昭璿臺熒玉燭土戌息銅  
鑣階峻依辰極門閒近午橋登龍爭曳裾走馬亦銜鑣

好士同三吐寬人減八條量能容海嶽言且詢芻蕘寶  
錄傳千禧祥鸞下九霄祈年諸誥在應使勒青瑤

滿洲中堂生日作

上宰乘元會台司領百官

帝圖開景毫相業邁貞觀地接三階遠天擎八柱寬進  
銜跨殿右正色立朝端在昔需楨幹先時奮羽翰鍾靈  
當五際作德兆三韓位陟行前省名高柱後冠裴遵頌  
誥紫尚父受書丹日馭排雲動星文射斗寒雌裳加綠

緌貂錦賜黃盤坐見諸荒闢真成一德歡開疆踰鹿海  
通貢到烏丸社稷彌安祚江山似奠磐四征恢睠渡一  
日下瀧湍宣力舒肱股推誠見肺肝修鱗游善下行馬  
出常單衡直知輕重羨和辨苦酸憐才收駿骨赦過傍  
雞竿鑄鼎鎔成鉉鑠圭秉作桓勤能移苑甕儉且節堂  
餐劍重

今皇錫門弛漢相闌生當箕尾度歲值昴星攢甲子週  
方始箕疇行正繁觴傳衣弄綵紱絳矢垂絙旭日纏南

陸秋花發上蘭三清如寄祝好傍帝臺鸞

上巳申江修禊和任明府韻

久惜春過半剛逢日在三  
前裙雙檜里放槳百花潭  
碧浪將螺寫紅桃似酒酣  
觴傳流水曲歌擬望江南  
雨歇烟逾歛雲開日尚含  
迴車沙溼溼觸屐草氍毹  
寶瑟當眉豔香餠入口甘  
隔花逢姹女採藥笑童男  
近郭生寒火遙山障彩嵐  
當筵雙進舞非復舊何戲

送梁京兆之任奉天魚訊姜少京兆



峻秩遷京尹高名過趙張青雲連北鎮赤伏北南陽居  
重安如石官清凜似霜玉麈新作篆銀菟舊為章地入  
三屯勝軍從九衛防渾河迴障遠澄海度遼長屬國踰  
平壤降番處兀良城垂荒徼路廳傍故宮牆朝日沙間  
白秋花雪後黃通關持虎節候吏着熊裳王駿留三輔  
韓維置八廂端察吾友在好為寄雲壤

賜筆記

思和韻

黃紙傳深禁丹毫賜上官文章三館貴頒賚九霄崇前

史修方始尚書給未終

時以修明史月給筆札

牀聯雙襖下帕用

五絲籠綠鳳題名重

筆有文犀綠鳳赤刀綠字諸名

青羊作被豐跗含

膝似石頭截竹為簫折穎堪垂露吹毛擬旋風澤研桃

洞碧鋒透行波紅久負簪疏劣長慚荷橐工編摩難按

實感慨但書空誰望衣裁紫翻教珥是彤班僚封薛稷牆

壁置王克嬪御頻呵凍兒曹未發蒙銳頭靈壽伯禿髮

管城公起草依簾外生花憶夢中敢言金玉飾三品贈

湘東

夜飲施少叅邸舍同諸徵士作

論學申公邸銷愁阮氏卮烹魚設饌早射雉應聲遲觸

幔驚槐葉燒鑪揀桂枝案間文似續

少叅有上宰相書  
極言諸徵士寒苦

座間索讀欄際雨如絲禁苑鐘傳後天街人靜時徘徊紅燭

下何處不堪思

張通政初度八韻

北斗轉珠綸南山倚殿新班聯親

帝座出納羨王臣珮委看皆玉臺高望似銀受書開畫  
掖司命出丹霄雲闕爭扳翼永厨善劈鱗百年忻得歲  
四坐喜同春平子名逾盛張憑論有神長庚秋正煥莫  
問柳邊辰

恭送

仁壽

孝昭兩皇后哀詞

有序

康熙二十年二月一十九日

仁孝皇后

孝昭皇后兩梓宮啟自沙河將遷墓於遵化陵園羣臣  
送之者齊集於寶家庄之西塋惟時龍輜乍移鑾衛  
先發曉月未落悲風斯起

皇帝親臨祖饋躬奠殯階六衣在筵雙轡載道啟鸞軒  
於宿隧擁蜃輅於新沙將欲使八神警引五校戒跡  
宮紃數十列于仗內閱器百雙載之馬首自親王滿  
漢諸大臣暨福晉公主格格奉恩將軍之妻皆俯伏

輿傍哀號道左天慘地裂山鳴雷動咸思仰攀黃帷  
俯挽朱紉盼輦綸而莫逮駐鸞蹕以何由因祇送縞  
輶私抽彤管下述愚情上頌懿德恭惟我

仁孝皇后位正宮闈教先嬪婉紘綖既組種稜是親乃  
以璇宮銜燕之姿當茲畫棟盤龍之日六駟馬上長  
輪繭御筐箱百子池邊早帶高褕弓韜廼生殷於癸  
乙人望流星暨誕啟於辛壬母先化石飾椒塗於天  
上展蘭殿於雲間亦越我

孝昭皇后進承璽玉繼賜褱衣重看貫月之輪真是覩  
天之妹長秋宜配有司將玉輅迎來皇夏堪聽命婦  
用璫衡佩入聽雞鳴而警旦馭翟衛以朝元崑山和  
麗水頓見前碑壁帳與金根竟成宴駕兩度

皇情之創痛六年臣庶之哀思雖揚雄之誄漢后麗筆  
難傳即錢起之挽貞懿徽章未罄恩留府事無須莊  
憲慈仁化起宮人不數長孫節儉遂于上軫旋幽之  
際抒此左言敷善之情敢曰黼筵在御仍修念詞庶

幾旒旒當前還同振鐸云爾

梓禁分行帟椒塗引去輅祖成雙殯啟

后出百靈從壺德無先後喪儀備吉凶鳴鑾頌五校拂翟謁  
諸宗鹵簿迎朝旭陵園建上冬連年停纚綉一旦轉碣  
礮路饌惟三獻泉宮尚九重靈幢遮蜃飾禮服覆醫容  
扇導當乘鳳車臨儼濯龍環山圍畫翬配地捧黃琮寶  
獸如雲擁金螭向日銘朝官呼械械命婦泣淙淙妣喪  
真堪痛嫫賢豈易逢人方師儷淑史已誦偕雍纘女承



先如生商賴有娥脫簪弛髮髻鳴珮聽璫琤琮曉月移蘭  
殿悲風起桂茸姚墟餘舊德華渚式前蹤兩組傳旒旒  
雙函閤冊封茹開金觥菓鑑掩玉芙蓉藻輦終辭載桑  
壇久罷供渭橋哀舉紉長樂厭聞鐘虎衛嚴中馭蟾光  
掩下春心經河畔草目斷道傍松製策踰齊敬題碑羨  
蔡邕誅詞懿未盡歌挽痛安庸林露銷青薤軒星入紫墉  
英皇齊駕去盼煞九疑峯

翰林院掌院學士生日

丹地掄才子朱衣引近臣

天威嚴咫尺師表動班隣位列槐廳長人從香案親百  
年昭黼黻早歲掌絲綸鷺集堂皆玉螭盤印是銀錄裁  
時政切史總大綱陳祕記唐司馬微文漢獲麟橐中贍  
海嶽柱下見星辰北苑黃花發前關紫氣新集賢能祝  
歲安數曲江春

甘霖應禱恭頌二十韻

四月分龍少三農望歲長汙邪曾未溉雲漢久為章少

女吹難定司巫舞欲狂天無升墜意人鮮賣雷方

聖德同於穆精心感顥蒼為壇供太乙酌酒禮東皇郭北  
祛燔骼街頭禁暴尫朱絲紫漢帝金鼎告殷湯雩祖分燼  
碧祈官入幄黃甫省浮蜥蜴頓見舞商羊有滄銜衣起  
流雲作葢張衝泥成吠澮鞭石勝江湘仗濕甘泉潦盆  
傾洞府漿不稂歌帝力多忝祝神倉洗甲傳荆楚停囚  
在洛陽春秋曾誌喜宵旰已如傷忝御諸司嗇言觀古  
太常雨來慚東哲菑去笑京房林翳遙山色花漂上苑

香須知畿甸廣從此慶茨梁

寄祝董太史尊人七十

東國衣冠在西堂几席連千秋雲伴侶七十地行仙肇  
氏來千乘通儒繼廣川晚能遺世寵早為領時賢遠道  
迴車轍長橋理釣緡才名齊顧劭干請却任延庭有三  
珠樹園藏九疊泉膝前看鳳翥物外得鵞鶩花石新探  
乳蓬池遠獻鱣數從金簡發書以玉杯傳嶽降逾良月  
林居獲大年羣瞻華髮曜屢舞綵衣鮮家餉餘杭酒門

停甫里船一觴遙寄處敬誦白雲篇

秋夕周金然編修招諸名士集張氏園分賦得

銀漢

做唐試體  
以題為韻

顥氣經秋肅衡潢入夜新周天雲作埒倒地水無垠風  
逐蟾車度波從鵲路堙低垂千尺練斜嵌一條銀輦下  
星辰合筵前瓜果陳南皮高會去何減汎槎人

又賦得白榆

商節司青女秋山下白榆月中看去靜天上種來無陰

久門成列鑽還火在膚危巢飛赤鵲夾巷擁青蚨赴社  
歡俱集眠床嬾未扶鄉心千萬樹總向酒中攄

喜遇王二光祿有贈

我愛王光祿同居幸比肩學成荀況日策獻買臣年石  
匱家如寄金門吏是仙大官留熟釜好客散囊錢歲共  
登朝履人懷入剡船他時醉春酒相待鑑湖邊

上李相公

相室開三運師臣總庶官紫薇長啟曜仙李舊能蟠

天子尊伊陟蒼生倚謝安鴻文標正始嘉績邁貞觀位極  
平章府名通泰乙壇君臣同德易父子上公難韋苟傳  
來久度刀佩去寒迂衡真穆穆尚父自桓桓職衮將絲  
補堤沙共泰搏山河排作繡日月捧如丸麟擾黃扉外  
鸞迴綵筆端引經千佛會押字百花攢綬曳圭恒輯金  
銘印豈刊招攜開閣邸吐哺罷堂餐九宇遮成障三街  
望似磐明心垂寶鑑密語傍金鑾鍾傳驅車小蕭何賜  
第寬年纔臻葛恪學已過甘盤論語行將半丹青寫未

完他年靈壽杖會作應龍看

集閩縣方京池亭同鄭宮坊前輩高北陳日浴  
定國即席分韻得花字

良讌千秋勝方塘十畝賒飛飛天際雨的的水中花古  
荔蟠雙磴空亭枕一涯壺冰傾醴酪甕醢雜魚鰕香繞  
雕樗直牙翻鏤字斜

時戲翻詩  
牌行酒

呼盧驚浴驚出燭及棲

鷗客盡來蓬島人如汎海槎女螺纔咫尺何必問薰葭

賦得紅藥當階翻



曉日穿朱網春風拆絳房重臺方漸啟兩朶正相當翠  
發年前種紅添午後粧縉芭疑婦繡落葉帶官黃洧水  
貽香遠邗江舞袂長孰憐偏反意留詠在東堂

過汪二檢討新居和馮三郡丞韻

履道坊仍僻安仁宅不譁閒官栢紫陌逸興繞丹霞市  
隘門逾靜庭虛徑自遐近墻新種竹隱簾舊安花劍買  
秦王寶文祛左氏誇屏風排紀亮書乘載張華擊坑娛  
心意銜杯漱齒牙高談時據檻下直當歸家禁裏分題

祕薦前起草賒蘭臺聯柱下何用達南衙

陳開府生日

出處原乘運安危久繫身十年膺節鉞六度轉星辰海國  
存元老方州憶重臣孤懷如執玉兩鬢未垂銀頌起桐鄉  
近碑傳峴首真殊方猶戀

主軫念為生民日出浮雲散時廻大地春翟公門下士誰是報恩人

八月三十日

上賜翰林院諸臣御河鮮藕恭紀一十八韻

曉日瀛臺殿秋風水殿涼賞花開寶帳收蓉薦銀塘

敕使宣中秋分甘出上方宮僚皆受賜翰苑獨先嘗種獻  
蓬山遠根蟠太液長紅衣銷紫漫綃蒨墜青房塚去如  
堆雪橫來似截肪蒲枝聯作帶菰葉織成筐嚼入冰淘  
冷烹疑茗粉香慟剝包筍白且掩覆蘼黃洗骨迴仙島  
虛心答昊閭纏深知節苦折處見絲颺鼎俎堪呈質汗  
泥不染腸量材逾七棗挫藩得三漿不畏相如渴何愁  
孔凱狂盤傾金掌露七割玉臺霜華井誰含片天池甫

佐觴願將千歲碧早晚進西王

西王母進  
十年碧藕

何使君紀績詩

秦望羣峯峻耶溪萬壑流專城居刺史千騎擁諸侯望  
族鍾洪澤聲華冠鬱洲才非平叔下名與敬容儔振筆  
翔鸞鵠擣文射斗牛起家由祕省出守監炎州五玉桓  
蒲寵三山鼓角愁憑忠歸漢節含笑佩吳鉤重簡東南  
牧長寬社稷憂清風吹畫鹿甘雨拂鳴鳩井邑桑麻潤  
宮牆桃李收蒲鞭栽綠梗花篆沁紅油虎自江流渡魚

從廳事留餘波沾鮒轍砥柱宅龍湫邁德傳經遠昌圖  
錫祚優盈巢皆鶯鶯當道見驂騑河畔桃花發淮南桂  
樹秋門高容上駟庭敞列行騶進秋褰帷出匡時借箸  
籌子牟懷北闕嚴助闢東甌自媿龍丘老曾陪兎苑游  
徵文當紀績聊備史官搜

慕中丞起湖北巡撫有贈

東海珠仍合中天日自開謝公真再出寇氏喜重來敕  
自

皇恩下裝憑使者催建牙褒鄧表移鎮楚江隈半壁恢  
雄建長城仗鉅才民皆思雨露

帝用感風雷嶽勢蟠南盡湘流至北迴萑苻看驟輯魑魅  
敢還猜馬識前時路烏飛舊日臺君恩何所似江漢水滌洄  
春晚曹顧菴學士過天中署夜飲即席和見贈

原韻

侍從雄東觀才名擅北宮與君違越嶠過我在天中華  
省書仍秘長沙賦轉工清釭新釀綠古署暮花紅把臂

憐時逝談心及漏終羣游懷鄴下三篋記河東每望天

垂斗相逢月似弓賜緋真熠熠

時學士授  
瓊得六緋

結珮莫匆匆

合座皆枚叔空罇媿孔融陽春纔有和切勿笑巴童

十月朔午門

頒歷侍班恭賦

鳳律開平朔

鸞輿啟未央祭時歸

太廟

是日以時祭  
太廟迎

駕

頌歷坐明堂道夾珠旂轉庭開寶籙長司常將舞鸞掌

餽不供羊疊冊裝縑麗開車覆帝黃

用人與十餘米背載歷覆以黃帝

封箱押小面記印泥方殿上呼三壽階前奏八琅五官

陳夏令百辟奉春王數合軒轅紀班隨星宿行授書馳

赤縣開卷遇青陽葉向莫堦拆花含黍谷芳敬天方嗣

服歷數正無疆

駕幸溫泉恭賦

羽肅句陳外波開帳殿中咸池長浴日華渚自流虹曉



度榆關遠春從忝谷通慈寧扶葆馭神策駕豐隆盤溢  
銅仙露牕含玉女風青泥分太液紫氣接居庸淨可捐  
煩慮溫能養

聖躬醴原逢處合仙井鑿來空衣藻泐渦碧巖花入照  
紅濛堦將赴壑聽水似呼嵩鐘乳浮銀椀松雲鎖玉櫳  
起居長樂輦扈從華清宮舜德時存坎湯田歲轉豐甘  
泉徒有賦未敢擬揚雄

題耕隱卷子

有序

邑前進單能重先生名璠隱居西山下自明洪熙至  
成化杜門絕仕進別號耕隱同志並為詩贈之迨今  
幾三百年矣康熙戊辰其裔孫廣宗為修其遺卷示  
予予捧而誦之有二洪先生一名鐘一名鏞皆洪宣  
間詩人其詩類元和長慶諸名家而其字不傳并不  
識住何所其子姓于今誰似惜前人輯詩家不能旁  
搜而邑有前進如是不能一表微為可憾也因取仲  
洪先生名鏞者長律一首依其韻和之雖慙續尾顧

私喜一日附兩賢後乃應廣宗請而復為識其大略  
如此

舊氏傳江表前賢住郭西此山曾豹隱深巷有烏棲地  
僻難迴轍春陰自洗犁隨時觀塞馬翫世等醯鷄但辨  
麻和菽能忘釜與蹄壇邊松障合門外柳枝低乳犢銜  
芻出新鶯繞樹啼商歌留白石叢話記青溪奕代存風  
節居家鮮傲倪川迴魚汕藻堂改燕巢泥筆篋餘花譜  
衣形想稻畦閑看三徑菊貧授一莖藿茂族開於越高

風著會稽詩題王霸友隱並老萊妻故老行堪式賢孫  
卷自攜遺文追往哲流譽滿中閨

附洪鏞原詩

吾邑西山下君家住更西百年忘寵辱終歲樂幽棲  
沃壤資三熟生涯在一犁呼兒勤飼犢戒僕早聽鷄  
高棟縣龍骨衡門絕馬蹄來牟連屋近桑柘覆簷低  
花外提壺語林間布穀啼沾濡天雨澤灌溉水分溪  
托跡堪隣鄭窮經合並倪不辭身滴汙寧憚足塗泥

曉摘蔬盈圃秋收稻滿畦  
甌香炊白飯甕淡釀黃齏  
禮讓誇淳朴經營笑滑稽  
相親多野老主饋有山妻  
靜裏詩還覓閒邊杖復攜  
優游太平世何必慕金閨

西河集卷一百五十三

欽定四庫全書

西河集卷一百五十四

翰林院檢討毛奇齡撰

排律

聶明府生日

荀蕝來榆次言游在武城愛將花自種操與水蕪清飛  
鷗瞻鳬近園扉見草生亭邊三老約指下五絃聲楚戶  
全輸版甌蠻尚用兵賣刀同虎渡懸鼓中雞鳴白望聞

俱歛黃巾戒勿驚仙郎真列宿神父比長庚棠舍千秋  
意桑弧四射情登堂無可獻折取早梅馨

雙壽篇贈餘姚諸徵君

丈人稽郢後垂老舜江邊自昔稱三俊於今踵七賢占  
為鴻漸卦註就馬蹄篇隱向梧中據閒來柳下眠銀牀  
穿碧甃寶鼎發丹田藜杖鄉初設桑弧牖自懸庚寅皇  
覽日甲子義熙年物外餘幬帙閨中喜緼絃龐公偕伉  
儷鮑女本神仙河鼓牽朱輞

初度在  
七夕後

江魚列綺筵相思



何所寄唯有綠霞篇

遙同淮上諸公九日遊裕親王園林登高限韻

得徒字

有序

予于九日過舒南宮舍人邸舍值淮上丘學士兄弟  
李明府張孝廉諸公車馬四集將以是日游裕親王  
園林作題糕之會呼予共載予適以他集不能從既  
而諸公各有詩即席分字限一十二韻彙錄見示昔  
梁孝王闢兔園召客自睢陽為複道屬之平臺凡四

十餘里而河間王德嘗築日華宮置客館二十餘區  
以待學士今親王為

帝室賢胄肺腑枝葉其開園築館原足為賓從厠足而  
諸公以鄉枚之才偶接蘭坂即能銜盃抽牘以當獻  
頌此在鄴宮讌集所稱良辰勝地賢賓盛主莫過于  
是而予以無分不預則其為悵悵可勝道哉嘗讀韋  
學士和唐主九日詩知學士亦未嘗預會強顏作和  
而李白九日不與崔侍御同遊敬亭然猶有寄侍御

詩見之本集予效贖附和亦請限韻顧未知其與古人何如爾康熙戊午重九後一日某識

九月八

皇都秋高海雁徂將車來舊邸懷刺向當塗紅藥頻年憶黃花滿地鋪宋公方戲馬陶令正提壺期赴尚書遠筵陪侍御無賢主開碣石豪士進彫葫積善坊邊柳高飈館後梧留題雲作牘分佩水為符帽落違江夏巾推記義烏登臨還倚樹附載豈編蒲梁苑饒詞客燕臺盡

酒徒相逢能唱和清興未曾孤

寄祝同年汪編修尊人雙壽

三壽函金冊雙星轉玉繩  
喬傳汪仲舉兒似柳吳興  
天上絲綸展人間歲月增  
桑弧懸鵲血門悅絳龍繒  
國老扶來罕閨閑得未曾  
登朝惟齒尚舉案與眉凭  
鼓瑟歌方並開樽酒是朋  
千年桃實結庶品蕙肴烝  
鳳喜翔新竹鳩看集古藤  
傳經貽碧檢染紙用青菱  
瀛海濤千頃丹梯路幾層  
一觴慙寄祝頻首誦岡陵

奉酬董公子致平貽贈十六韻

紅杏園初啟青槐路未遙高門逢勝集公子踐佳招碧  
浪迎人醕紅泥坐客寮車迴攀柳候茵藉落花朝誼以  
雷兼鮑名如董共鼉文章橫蓋代意氣上干霄八斗才  
無敵三餘工不佻虛懷嘗抑抑玄箸本超超東閣張筵  
遽南皮發興饒庭聯天廐馬世插侍中貂衣染墻葵汁  
書紫帶草苗琴心傳鳳曲劍鼻刷犀膠酒榼頻添漲薰  
鑪欲上潮邀朋皆黼黻投我是瓊瑤道在雲嘗合詩成

星暗搖雙飛看鷺羽不忍度河橋

許使君詩

聖代推觀察雄藩重列侯雙旌開鎖鑰千里藉懷柔  
勵治資良牧平情簡督郵巡軍星照海行部雨隨輶  
碑接山陰道屏高甬上樓旬宣踰八越保鄣近東甌  
鑑遠無疑牘刑寬省要囚庶辭原憲粟儉着晏嬰裘  
勸駕乘羸馬耽書臥小舟亭遺黃絹字道鮮赭衣偷  
入市攜刀賣當筵借箸籌捐金輸士困貸粟賑民流  
自媿樗材劣曾

經藥籠收宮牆傳五教稷下闢三鄒絳帳依南郡青雲  
起道周微文難紀績聊以代方謳

題傳經堂詩

至德聞荀里高名著鄭鄉人方垂繼世家本住橫塘門  
對新花嶼經傳舊草堂青山迴慢檻綠帙滿巾箱書帶  
牽隄遠垣衣繞砌長生徒閒授几賓客靜傳觴詞業延

中秘忠言肇侍郎

其先侍郎公為靖難建言有聲

一門追顧陸四世見

袁楊駿烈遙堪誦清芬久自揚  
檣舟停下去豈是戀滄

浪

蒙孫國公徵灝請召西園讌集有贈時予將南

歸舟次奉答

國公係義  
王之子

西邸恢前緒東吳紹世修標名同燕頤覲面在螭頭爵  
過平原秩人如康樂侯田猶頒鄴杜文已駕曹劉家自  
傳盧矢門無詠蒯綏張錢長却會襴刺竟先投突室琴  
樽靜閒園竹樹幽高談驚遠聽散帙恣冥搜醴向晴軒  
設車從胥井留鼎脣沾雀蛤褥縫對犀牛憑袂先王几



觀銘舅氏自當陽塞武庫弘正醉書樓宴比東堂勝詩

方南面優

公詩名擁書堂集見示

天才傾八斗國士感千秋金券

文難紀銀泥緘未酬柳城相望隔思煞潞河舟

寄祝劉母王太君

錦悅開雲縵朱門對水澄清罇傾綠醕峻節著青菱晚  
歲能餐桂當年重飲冰硯灤提甕水書照辟纊燈身是  
陶貞烈庭趨劉孝陵并珣頒錯落棹枿表峻嶒甲子人  
間換初陽地上升環葭飛玉琯覆斗絳珠繩衣舞新綢

綬堂鋪舊甃桃花開有日坐見歲時增

看菊聯句

為楊雲士菊圖作

北苑尋幽鞠

姓

東籬見治牆佳名渾不辨

張杉

妙植想多

方種集伊川盛

姓

泉通鄜縣香銅鑲鋪處白

杉

金盃鍍

來黃龍腦蟠銀埒

姓

獨絲旋錦囊輪銜千輻廣

杉

錢取

五銖良蠟朶紅兒髻

姓

檀窩青女粧苞沿舒茗甲

杉

辭

底綴瓜瓢敵類仙盤舉

姓

圓同佛面張微紅名馬蘭

杉

小臭似蛇牀塢闢辛椒外

姓

園隣苦竹傍穿鶯疑住久

杉報雀欲銜將高士裁為佩姓夫人染作裳分花餐屈

子杉釀酒送長房合蜜園松餌姓和英煮桂漿翻叢祛

蛺蝶杉啄蕊妬鴛鴦暫吸枝頭露姓潛窺葉上霜候遲

猶猗猗杉風動自低昂重疊排成障姓離披布近牆記

時存小正杉遣興在重陽賜鄴悲將老姓橫芬誦有芳

秋葩應晚歇杉為我罄餘觴姓

送任生北遊有序

春草初碧朝雲欲馳集江上之離亭送樂安之公子

千里名高遠度黃金之館三洲歌苦同銜綠玉之卮  
趨庭須早計但作方遊即席有貽言不拘句韻

客路饑驅遠離筵酒上微關山方漫漫楊柳正依依市  
劍吹花鏑征衫換葛衣燕臺需駿久塞館度鴻稀薦引  
思嚴助遨遊重陸機高堂頻慰去勿使傍柴扉

贈胡少宗伯八韻

南省推常伯東華景從臣披雲常見斗有嶽必生申祕  
閣專詞翰崇班領搢紳典從三禮貴賓與四門親伯始

才無敵蘇湖學更醇名標仙閣上家在射湖濱秩序追  
前哲文章獎後人升堂纔咫尺相望轉逡巡

寄祝王匡廬先生七十初度

即新城王禮吉東  
亭阮亭三先生之

父也

甲地開華閥高筵啟玉壺人間瞻岱嶽天上見南弧第  
五名偏重無雙譽不誣孝思懷牧伯至德紹司徒書繫  
堦前草冠栖城上烏交遊同郭泰論議近潛夫皂帽龍  
垂尾丹山鳳有雛却官成八俊教子得三珠賜饌長遺

膾徵車好載蒲鸞書天外錫鳩杖國中扶奕世多傳寶  
羣賢有繪圖一觴隨獻遠未敢效吹竽

吳楷招會湯餅聯句

湯餅傳瑤席

張杉

金錢壓綺襦石麟摩外士

姓

河鯉饋中

厨主爵催浮白

杉

賓衣有拭朱試啼知大器

姓

占慶見

克問九子烏生好

杉

三羸馬相殊高虹天半玉

姓

滿月

夜來珠父子吳中復

杉

階庭謝幼興他年詩禮貴

姓

看

汝早趨陪

杉

吳氏又氏謝故有幼興句

禹陵

夏后南巡日茅山啟閔宮九川方灑滌萬國已來同宛  
委藏書古衣冠輯瑞隆羣侯遵會計江漢仰朝宗祀重  
陪方鎮功成抑下鴻層欄迴綵鳳畫地有黃龍藻染梁  
紋綠花銜碑字紅千秋新貢賦八越舊登封頻首滄江  
外振衣饗殿中翹瞻明德遠去此欲何從

郡太守許公遷寧紹兵巡副使賦贈

中巡加八使上秩賜通侯控地連滄海開轅在越州金

胎吹外幕玉箸借前籌民事關心切兵行錫命優專城

原倚重治郡早推尤草檄憑馬首封書累箭頭盜因虞

詡息人願賈公留攀軾同蟻附遷枝相烏求碑橫剡上

路靴掛郡東樓

俗凡留官者脫其靴掛于庭

神武調軍騎星文割女

牛寇恂需歲月杜預註春秋

公註左氏傳付刻

自愧編遙服深

蒙顧敝裘釋冤開蔀屋解澤到荒丘

曾諭治先壘最切

茂樹陰

方接高天戴未休江湖千萬頃誰敢賦涪涇

丘大叅年伯七十初度



南極分樞久東山屬望專名高公路浦家近射陽田雲

闕青齊舊星垣碧漢連司民延世澤叅岳領時賢漢署

常紆紱淮流自理緡井公六博戲韋氏一經傳玉樹圖

瓊砌金英燦綺筵座中朱履集階下綵衣翩蓬島依兄

弟槐廳入後先看雲還棘寺

曙戒先生以學士左補大理

愛日度花

罇

謂季貞檢討也

佳氣浮簾幕輝光照里廛門楣揚鳳翮地胄

引蟬聯共有稱觴慶寧忘授几虔相隨羣從後敬誦白

雲篇

奉謁通政楊公林居感贈一十四韻

上闕標雲路高門啟道鄉詩書傳百代名德冠諸楊臺  
出金銀表官居喉舌傍天書垂左掖卿月照東堂假沐  
還泉石因閒問梓桑往來申浦楫偃息午橋莊自愧紆  
三策曾經汴九方予讀卷舉主出公門下袁公四世植陸氏一田  
荒種杞孫枝詘傳衣祖製亡到門慚舊主開宴謝新昌  
為仰千秋鑑來窺數仞牆一時依斗曜三日接衣香人  
望年來屬天星曉自張徵車應在道執策敢相忘

葉使君六十

會見黃星燦長疑紫氣連應鐘方啟籀甲子又周天族  
是諸梁商家藏虞仲篇論文誇魏晉對策入幽燕製錦  
潛江曲專城桂水邊郡留黃霸蹟人謂冠恂賢音問三  
秋隔相思兩地懸誰知違俗久頓使杖鄉旋設矢逢初  
日稱觴祝大年金門邀曼倩同望赤城烟

贈副都御史金君

北闕推司憲中臺肅準人兩京傳舊族三坐見親臣上

殿呼張緬諸曹拜却說朱衣長拂面蒼珮儼垂身抽簡  
如凝雪驅車摠避塵五花堂上列六事御前陳道可孚  
中極清能救外巡時君有以清廉救外臺疏文緣章奏重治驗紀綱  
新在昔瞻雲切於今披露親埽門徽典客觀國利來賓  
啟署通南省依垣近北辰槐廳慙後起還展舊絲綸

康熙乙丑予奉

使分校會闈得士一十二人竣事恭紀兼呈同考諸公

三十韻

試士開三省徵書下九重名標文德殿宴列武成宮同

考班行盛諸房領去崇翦金花插帽浴鐵馬安籠魚貫

先開闌蜂攢後捲蓬座如聯宿上堂以聚奎雄

內簾中廳名聚

堂布棘藏知雜垂簾示至公硯分新詠液題拜小黃封

是科上頒書題用小黃使席供旗細官廚煮桂濃

封硃書接出上寫御封二字

吹鏡來堠北擊橈在牆東畫壁皆麟鳳標籤類活東卷

排千字蹟闌限五經通到晚門箱赤中宵燎舉紅九龍

天上現萬蟻穴中攻啟薄覘多例

未閱卷時先檢科場條例

焚香矢

寸衷主司愁失實進士苦雕空

林闡深鑄武成宮談天進士雕虛空係黃魯直

詩文獻都堂內神枯號舍中有蕉難覆鹿入牖敢窺龍

所藉千秋鑑曾無五色幘三呈皆白壁萬選得青銅勒

帛藏雙管收囊會九綾草編時有次花判月將終

編號次第

即草榜也每日各房判紙封卷篋

北斗魁為首南宮禮是從人方安夏

課長安舉子落第者率

誰敢道冬烘進錄盛箱窄題名

散炬融

書吏填榜名國以萬炬

闡開雲葉葉榜放日曈曈宿館祛

甄甃

升鑾伐鼓鐘賜袍披織綺開宴舞尋橦

放榜後賜宴禮部教坊奏伎樂

賜花賜綵  
既表裏

因謝同荀誼翻慙獲狄功井亭深鎖處長盼

隔牕桐

鏐院簡王編修同考兼呈難弟侍郎主文十韻

龍並雲間躍人同馬氏良弟方司主校兄反作叅詳以舊

房校名  
叅詳官禮序迴驚列

溫言下鳳章

時院中接  
旨令勿嫌避

隔屏分上座授尺首東廂四

闕優三館羣空賴九方同臨戰蟻穴忝受獲麟房

宋嘉祐  
祐倡

和詩有萬蟻戰酣春盡永句藍汁文千點樺烟燭幾行  
予以領房官闕閱春秋故云

位因同考近分以後塵相館規予與兩公相為前後輩海濶容流細

天空任羽翔聚奎堂畔月相對意難忘

過劉少叅宅有贈

北海標通德東田返近臣白雲仍在望絳節舊曾巡  
野非閒地歸湖有上賓擣茶花院靜讀易草堂春  
丹鼎招仙客金魚付酒人題詞俱咳玉封冊總泥銀  
禁闥思嚴助台階讓賀循長干初置輦白下漫垂綸  
跡共潯陽



隱交從北府親有誰司國舉唯汝東人倫納履龍門峻  
披帷燕賀新思深猶望歲游滯已兼旬霜雁飛黃浦秋  
楓動

紫宸欲因

徵詔切從此捧車輪

趙弟舉茂才書扇志喜

雅度如臺並晴江賦采芹父為晉成子兄即趙觀文珠  
玉方呈彩驂騶迥出羣開襟飛紫電跬步上青雲佩重

搖金穗衫踈映繡紋平原佳子弟知向武陵分

送家僉事提學雲南

司命開南詔除書下建章經傳宣聖里名冠鄭公鄉久  
列螭頭仗曾含鷄舌香縹箱疑武庫珠斗見文昌比士  
昆池外衡文洱澤傍猱間垂甫掖瘴裏判干將八代唐  
文重諸生段氏良國書傳杜佑家學本毛萇東壁舒光  
遠南溟得路長雁行迴復處相憶在瀾滄

丹陽別羅坤

作客鄉關遠懷君歲月深過江逢管仲入幕見陳琳代  
北方馳騁茗南久滯淫未懸腰下印長散橐中金入俗  
饒玄度憐予得素心烏衣人共訪白下酒同斟世已嗤  
求駿吾將效展禽天低垂去轍雲滿未分襟龍跳難為  
友鴉棲不擇林丹陽重惜別相對起沉吟

胡副憲生日

烏府垂標峻青陽感氣新藏書柱下史執法殿中人入  
陞長連臂居官善逆鱗週天剛六甲練日及三春指直

冠如鐵風清簡似銀明時無可誦但願作良臣

二

憲長岳三坐端公擅外臺春風吹海甸曉日近蓬萊使  
作儀同貴生占宰相才程琳饒氣節王儉著風裁珮有  
蒼龍繞門呵驄馬迴祇因留柱史紫氣滿東來

寄吳制府廣東

妙略雄南服鴻恩賚上京五年專祭戟獨坐領簪纓冊  
授金鰲勝兵摧玉洞平三門新辟壘八克舊家聲重地

深分履前轅早樹旌詔從雙鳳闕節授五羊城谷轉枕榔  
暗旗翻翡翠明趙佗終北拜馬援且南征操得貪泉厲  
名因累石成朱方行處樂白雉貢來輕磐石詛茅土河  
山倚保衡八行難盡意長使寸心傾

吳門喜遇郭裏圖飲次留贈并謝所貽聯句

作客當三伏姓懷人在一方銜鑣逢茂苑張把酒對金

閭意氣干雲上姓追遊度日長高名通宛洛杉近歲返

炎荒藥採安期澗姓金攜陸賈裝賢王驚賦彩杉時郭

以詩

百韻贈俺荅公蠻女授衣香家隔駕湖遠姓山看虎阜  
每一字酬一金

良歌迎桃葉渡杉居近百花坊金屋嬌還貯姓瑤山讌

未忘尋仙同許邁杉結客過吳光何幸貽歐冶姓兼之

贈楚縵峯前瞻縹緲杉亭下詠滄浪座愛林宗友姓行

陪郭伋觴臨岐乖報諗杉為我俟河梁姓

挽陸母

萱草移金闥蘭旌返玉樓太君如湛母孝子是王修機  
織思難斷杯棬澤自流堦前黃鶴去天際白雲浮至德

傳聞訓餘哀減蒼謳只憐赴弔晚偃蹇愧南州

觀徐昭華畫障作

吾郡閨房秀昭華迥出塵書傳王逸少畫類管夫人紫  
水和泥染青山帶露斂蝶衣聯繡褶花片滴朱脣閣上  
煙雲曉階前草木春祇愁頻對鏡圖作洛川神

西河集卷一百五十四



欽定四庫全書

西河集卷一百五十五

翰林院檢討毛奇齡撰

七言古詩

巫山高

君不見巫山叢叢高插天前臨蜀道迴長川君不見巫  
山窈窕似好女朝見行雲暮行雨朝朝暮暮巫水濱碧  
蘿紅樹荆門春幽崑生風吹雨色迷却當年夢裏人夢

裏迢迢渡三峽十二峯頭暗雲葉風起難留巫氏家山  
前那遇荆王獵荆王巫氏相遇稀春禽暮蝶爭飛飛天  
半無雲粧綠髮風中有雨濕羅衣羅衣綠髮等閒變誰  
語荆王使相見若為淫瀕蕩人心判作琵琶蔽君面琵  
琶峯畔雲影長湯湯淫瀕流瞿塘共言臺下棲神女共  
道丘中伴楚王楚王宮裏細腰女爭望陽臺起歌舞不  
惜高峯化作神但恨春雲變成雨春雲蕩蕩流滿山椒  
花紅映青苔間南行若箇知才子空使春雲江上還

七夕曝衣篇

明雲初起芙蓉殿半月將開五明扇青女當秋看又來  
黃姑此夜期相見璇車自出絳河濱芝蓋遙迎紅粉人  
錦石拋時通錦字鍼樓啟處有鍼神星橋熠熠百枝動  
雲路迢迢七香擁夜半秦王欲捲衣天邊蕭史先乘鳳  
六宮羅綺張玉臺千盤錦繡開雲堆暗香畧動知風發  
好影頻移待月來千頭飛雉壓花綉九子盤龍帳中覆  
珠帔垂將露滴餘仙裙留向烟飛後此時穿線最難成

此夜乘槎最有情，幾看鍼孔雙絲度。裁問支機百思生，  
支機載去連太液。幾處衣樓耀寒碧，不疑絲女夜能舒。  
翻似天孫曉來織，別有豪華富貴家。金箱玉篋寶鈿車，  
爭道紅綃如閃電。爭言紫幔似輕霞，紅綃紫幔不曾褰。  
更有娼樓望靈匹，玉指泠泠展素衣。翠帶盤盤迴錦瑟，  
重有佳人怨秋暝。雕鵲填河暗通徑，只將雲錦連七襄。  
只將月帳為五詠，七襄五詠處處新。錦雲帳月家家春，  
誰憐畫閣懸衣外。復有長竿標布人。

擬古意贈襄陽李調鼎明府過訪

大江日夜綠春草日夜滋  
美人渡江來正值花開時  
花開灼灼滿江渚白舫青簾舊明府  
載得襄州郭外雲吟來秦望山頭雨  
東京元禮本是仙孟亭歌曲襄陽船  
恨無明月真珠佩解送春風大道邊

集東書堂即事兼呈祁五祁六兄弟

棲鳥遯遯起高樹大星落落流通波  
平船刺河冷著曙早來如此良會何  
晨光滿檐花滿谷窈窕虛堂映修竹

牙籤三萬甲乙殊仍列中丞舊書軸當軒進酒羅綺黃  
朱花夜池華燭光苦吟哀嘆愁人腸銅笙玉管藏曲房  
東山高洞久傾謝新墅難迴紫庭駕春日曾彈市閣閒  
落月誰歌墓林下相看每惜良會稀庭前又見朱花飛  
冰卮清接露華墜蠟槃橫繞珠繩低烏棲未棲烏欲啼

洧川楊花歌

洛城東行洧川裏簌簌楊花墮流水不似龐湘送我時  
西園但折綠楊絲洧川渙渙採蘭去不見蘭花見飛絮

垂楊十里春晝陰  
駟馬驕嘶不能住  
春船三月洧水多  
下江千里行難過  
漫天撲地楊花落  
馬上躊躇空若何

搓挪行

秋高夜明天雨霜  
黃河水流東  
湯湯丈人暮年戍疆場  
家中老妻夜徬徨  
小兒三十羽林郎  
丈人去時呼阿唐  
黃河水邊倒枯楊  
根株垂萎枝葉颺  
行人撫枝徒增傷  
好枝無根安用長

白日澹澹沉黃河清霜入水同流波行人早行過滹沱  
心思故鄉悲如何馬足凍折車漣淩辛勤慰悅徒旅多  
前飛鷺鷥後駕鷺鷥荒城投泊愁網罔城邊當壚雙綠螺  
入門便酌金叵羅秋風野池吹朱荷酌酒不飲當聽歌  
歌成一曲新陽阿聽之雙淚同沿渦少年苦貧但搓挪  
何為遠行心煩苛

打虎兒行

有序

禹州民朱兒救父打虎史使君廷桂獎勞之予識之



禹署

打虎兒乃在汴梁之禹州禹州城外朱家樓小兒十一  
隨父耕深林有虎斑毛成魑黑風吹草根乘風攫人  
誰敢攫小兒不識虎乃亦聞虎名虎來小兒怖欲啼掀  
唇見虎銜父肢咆哮草際風來吹兒啼向風不得父把  
杙打虎截虎路三尺童子五尺杙打虎落毛傷虎臆虎  
驚顧兒舍父逃深林風草皆無色禹州刺史呼小兒裹  
之以帛飽以糜子時在署識兒面耳髮穉弱真兒嬉問

兒打虎虎何似舉手張齒作虎勢假虎隱慢恐小兒小  
兒復怖將啼歸當時見虎得無怖此事我亦昧其故禹  
州刺史省得知是日小兒知有父男兒七尺傷父心天  
寒辭墓行求金安得棄鋏抱長杙與之同日還深林我  
所思打虎兒

入少林書事

嵩陽宮前山翠濃西行繫馬金牛峯新鶯啼歇綠楊裏  
潦水倒入清溪中春寒衣袖晚來薄細雨濛濛灑幽壑

林杪高穿雙樹行巖前時見三花落崔嵬紺宇本金布  
上界鐘聲出雲霧殘碑萬塚讀未成暝色空廓坐來暮  
山深寂靜鮮人語松頂微聞住春雨深厨野藿供晚餐  
竹牕新月明前塢老僧趺坐爲我言北朝舊是祇陀園  
精藍洛下總稠襍此中絕壁無攀援高丘相峙藏貝葉  
列祖持衣寡言說阿閣翻經降露華中亭斷臂飛寒雪  
聞言憬然動我心恍對秋潭卧冰冽夜夢胡僧折予指  
不記前身迦葉子難尋澗底三昧泉且飲當前八功水

蘧蘧却枕蝴蝶飛晨光養樹看熹微  
滄滄赤日上瓊壁  
大室少室爭光暉出門欲問來時路  
策馬悠悠何處歸

游石淙

游石淙石淙不可渡倚翠屏兮有雲躡  
流泉而無路流  
泉激激上有臺叢品疊石嶂中開品前  
合沓流霞起石  
上玲瓏瀉水來玲瓏細水瀉危石絕壁  
叅差望來隔觸  
溜微牽莎草紅翻漚似覆蘋花白當年  
侍宴碧澗隅金  
輿玉漏開雲衢離宮祕苑游仙女石畔  
品邊到帝妹儼

流泉之調瑟比鳴鳥于吹竽今來獨上雲錦闕俯瞰長  
河跳流沫碧草薰開帳殿烟青蘿捫待珠宮月珠宮帳  
殿不復留青蘿碧草綠溪流望美人兮何處悵獨立兮  
山之幽山之幽兮水之曲春色芊眠兮水波淥看蝶舞  
兮中林聽鶯啼兮深谷鶯啼深谷柳暗催銜衣蛺蝶及  
春來只有流泉無旦暮年年石上自潑洄

桃源圖

桃花灼灼開千樹不記當時問津處明霞一片連白雲

中有漁人捨舟去捨舟欲入志未違桑麻千頃迎朝暉  
武陵溪上東流水時見桃花片片飛

九月十九日登淮陰城東程將軍塚

層雲盪晴空涼風薄枯草我登淮陰城秋衣振縹緲淮  
陰城東有高阜九日初過又重九閭君父子好探竒邀  
我登高共飲酒籬頭黃菊堆酒卮風前重把茱萸枝雙  
攜銀榼墜鸚鵡頻開鏤碗燒蟲螭飄飄千里試一望射  
澤鹽陂減秋漲烟浮蒼藹到海平日湧黃河向天上紫

霄高闕凌貝宮霓裳羽節吹長風圮橋再見赤松下淮  
王自坐丹霞中前臨巨塚近千尺半倚城根半葦陌水  
落難知王氏墳道傍猶睹滕公宅閻君本屬唐相餘稱  
言此是將軍墟神堯定鼎畫麟閣程氏高勲析珪爵曾  
留淮海鎮徐方因釋金龜塋繁弱千秋甲冑掩黃土猶  
抱旂旗走風雨介馬嘗隨龍虎號銜花近見牛羊舞秋  
風酌酒瀉玉餅幽思還視飛鴻翎昭陵西望久寂寞鼎  
湖南去愁青冥銅笙一曲倚鞞竹戲馬臺空散黃鸝把

酒頻看琥珀紅拂盡殘碑不堪讀

朱明府禹錫生日作

梧桐生朝陽不與槭棘羣鳳凰翥高岡燕雀徒紛紛我  
行淮陰謁朱博正值朱絲紱麟角關令長看柱下書幽  
民自奏公堂樂當年束髮珮玉琚皎如初日開芙蓉行  
文澔浙薄江海結交磊落填車輿須臾挾策動

天子一旦聲名滿燕市買駿時登百尺臺懸鳬竟下雙飛  
履臨淮百里著奇績前邁于公後師伯雨後甘城疊翠錢花



開射浦臨瑤席嗟予自視四十年長途索食蒙君憐  
綢不唱苦寒月絮袍解贈嚴霜天此地有漂母向曾飯  
韓信君豈一飯恩淮流本無盡淮流蕩蕩到海濶種樹  
忻能解人渴況有含桃墜宿紅真藉臨邛買消渴  
錦段要素情方春為汝聽啼鶯持杯欲勸山陽酒只看  
東流淮水清

卧龍山太守歌

卧龍山前春草肥卧龍山頂秋雲飛不知太守是何氏

唱殺卧龍山下兒卧龍山高起東越上有黃堂過天關  
云是當年句踐亭望若雄虹駕雌蜺高門鎧仗排虎獅  
有人坐中如母慈摩願撫頂善鞠育一顧三復千回思  
去年官兵戰東海白日蒼黃徙軍壘嬰兒奔走哭上城  
慈母從容為分解今年官兵鎮海磧日負長刀走如簣  
慈母週全最苦辛旦出舖糜祗安夕嬰兒無知乃有心  
口能作語還能吟龍山井頭掛銀綆綆絲知淺尤知深  
君不見井邊枯魚苦搖尾竟入井中食井水

採蓮曲

採蓮花花高葉復遮誰家採蓮女移舟徑入葉中去不  
見採蓮人但聽葉中有人語葉中語不可聽水漫聲將  
斷風多響易停欲將花紅比花頰欲將翠袖聯花葉可  
憐葉溜珠欲傾可憐藕斷絲難接絲難接珠欲傾可憐  
蓮蒂並頭生竝頭花蒂根中出比翼鴛鴦水上行鴛鴦  
飛自遠荷柄曲還擎擎將荷柄出荷浦何處相逢採蓮  
女蕩槳難教水鏡明分房不道花心苦亦有江邊解珮

人蘭橈桂楫傍江春折荷恐刺手濺水畏沾茵逢人如  
照影連榜似比隣不愁風起湖難度只恐江高堤易湮  
更有堤邊游蕩子揮鞭搖曳垂楊裏一時菱唱逐堤遙  
幾處蓮歌向風起蓮歌菱唱起江沙蕩子歸來近若耶  
爭向堤邊馳玉馬何如江上採蓮花蓮花復蓮花花葉  
何歲菱花搖知手摘葉動識舟來花紅豈可染葉碧詎  
須栽栽花不採摘花葉自摧隕採蓮須語蓮舟伴及此  
蓮花江上開

和載花船詩

并序

渭南令張萬青納青谿姬美其既姬疴屬女弟以迎  
將望來舟而瞑目令為之神傷作載花船篇闕里孔  
孝廉示予并屬和章

勸君莫唱楊柳枝楊花飄落無還期勸君莫上桃葉渡  
桃葉青青在何處君游渭陽值春月遙望江南柳如雪  
誰家城角種石榴不見平船住花埒白楊深巷野鷗曙  
十字南頭小樊素門前脂石解竿行花挿文魚駕船去

鬱金香汗染絳雲瓦棺玉樹埋紅裙綠珠井上冰初結  
紫玉湖邊日漸曛昭陽女弟死相屬眼見花間繞銀燭  
鸞弦既絕難再牽幸有蠻絲細能續漳河銅雀飛復飛  
大姨既嫁娶小姨只今張君作新壻清江重載花船歸  
我行江南望江路舊日烟花在何處西陵松柏風雨來  
但見青驄繫江樹涼秋月沒星代時珠房多擘秋蓮枝  
君能載花對花語道予曾和花船詩

登白鷺洲高樓值施使君留蕭江有懷

石陽城邊白鷺洲  
萋萋碧草環洲流  
層樓百尺俯寒潦  
有客獨登樓上愁  
樓前寂歷衆山暮  
萬里江流自來去  
天半橫吹顙浦帆  
雲中恍辨虔陽樹  
我來眺望九日餘  
芳洲猶採紅葉萸  
遙山不斷故鄉雁  
沿流時羨清江魚  
故人乘興久舒嘯  
千載南樓鮮同調  
看月寧分佐史牀  
臨風空著參軍帽  
相思渺渺紫素波  
秋花開映波中螺  
凭欄欲作登樓賦  
不見夫君奈若何

夜分聽江聲浩然有故鄉之思

我家住西陵慣聽西陵潮涼秋八月江關高西陵潮上  
時巨如波底長鯨號細若寒風來落葉相飄颻西行渡  
江不聞此曾宿嵩山少林寺傍長松踞溪水千樹萬  
樹香閣邊夜來聽聲不得眠宛如秋潮耳間落坐起行  
空林但見露華薄山頭月弦清漠漠月弦漠漠清欲流  
此時思鄉生暗愁迄今渡湖涉江水去家已是四千里  
江水滔滔向東去涼秋水削流不住日行無潮夜有風  
侵舷透幕吹淙淙水波欲瀉不得瀉搏激持回卒難下



中流起澎湃圻岸忽顛蕩孤舟本已在波浪到此那得  
避衝激橫流溢洲渚直下礙沙石初駭驚飈動地來既  
道鴻雷向天圻狼頭鹿角相迸奔白月初落天星昏天  
星欲墜雨颯颯推篷仰天星仍見水嗑噤洪波雖斂水  
尚躍舟中徹夜聽水落又如溪邊松習習響萬壑不疑  
身在大江裏萬里波濤去無已望中方擬過瞿塘夢裏  
忽憐歸故鄉歸故鄉聽江水江水有時轉故鄉何日返  
故鄉欲返不得遂夜聽江聲忽流淚

憶昔寄華亭吳山人懋謙到武林并憶沈翰林

憶昔華亭翰林夜飲吳山堂滿堂灼灼華鐙光豐鐔巨  
壘排幾疊妖絲脆竹分兩傍嚴城伐鼓下魚鑰高雲沉  
沉墮烏鵲把酒論文四座傾新槃蠟樹交花落東飛羈  
雉鵲西避今來已是十年事君游京洛我自還羨君辭  
賦留燕闕翰林久作大梁使至今尚滯鮦陽山羨君獨  
登黃金之臺搥鼉鼓左集漁陽右檀土挾鳳扳龍恣往  
來展蒯遵銅並歌舞劉生意氣不可說司馬文章更奇

絕君今貽我尺素書自數詩篇滿車篋吳山童童吳水  
深君來仍宿吳山岑渡江無楫兼無櫓還憶當年沈翰  
林

西河集卷一百五十五

欽定四庫全書

西河集卷一百五十六

翰林院檢討毛奇齡撰

七言古詩二

飲王大叅邸舍有感

越東節度琅邪公赤幢曲蓋紅鬚驄皎然清白不可犯  
二十州縣爭承風時當北府徙軍鎮部騎牙官擾民峻  
公嘗執簡挂虎門夜草封章曉馳進

彤廷震怒驅短狐直聲藉藉驚階除誰知民命甫休息  
反遣賜車去海隅今逢

天子重儒術束帛玄纁召公入東堂進士推卻說西漢  
諸儒薦王吉自慚六論不一通徵車礪碌空相從多公  
獎譽溢齒頰令我感激填心胸春宵月出勸杯杓坐聽  
宮門下魚鑰鑪火圍來炭餅紅山屏遮處燈花落芳菰  
精稗肴核鮮大梁之黍華池蓮高文雄眎絕流輩坐客  
縱譚驚四筵銜觴脈脈念夙昔十載相逢苦相憶何期

此地得追陪一見裴公舊顏色人生聚散會有時都亭  
高會直堪思獨憐垂老東華客醉裏騎驢何處歸

短歌

廣陵城下波粼粼吳家少女名阿真桃花為面日為影  
當軒一顧愁行人春桑初發采桑去五馬城南使君住  
烟絲漠漠吹碧林前路踟躕日將暮鴛鴦雙飛江水傍  
蓮枝已折蓮絲長他時自有連根藕莫道空聞蓮子香

明河篇

有序

毛甡游淮陰查繼佐孝廉並轡過張吏部曲江園觀  
百戲時秋八月十四日江南北名士十百來集凡水  
亭當湖樓臺館舍刺史諸王軍府伎樂畢出驚見妙  
幻目不及瞬自曙起烏啼迨夜漏盡日初出兩竿迭  
呈絕藝如灌河接魚勿得已矣絳竹綺羅霏微幼眇  
自傷淪落未易遣此盛會樂極哀生易于感慨又當  
烟竿熱層累逋上狀城郭宮宇人物狗馬簾幃鉦幃  
士女觀者填塞渚港亦有簫管燈紗相間映水烟模



糊奉觴女郎從烟霏霏中載它舟去亦又淒已跼鞠  
者閭生搗箏王生有清歌絕妙錫山朱生吳門孫生  
皆一時絕技擅場幸一遺觀明當散去聊從諸君後  
賦詩三篇一樂府一律一此題也時賦詩者十之二  
姓與張公子初煒詩先成人誦之劉漢中贈牲詩曰  
詞人罷唱曲江樓王孫晉曰賦傳明月夜詩動曲江  
樓張慕曾曰今來同上曲江樓崔顥題詩衆莫酬餘  
載東山釣史集中

明河潔潔秋夜長草頭露白生微霜淮陰客子感秋節  
愁坐各言衣帶涼東山釣史卧淮浦私喜涼秋及三五  
蹈海誰牽八月槎臨淮須伐三洲鼓三洲鐘鼓淮水濱  
八月乘槎好問津邀得江南流浪子迎將河朔冶游人  
江南河朔兩相望河水星光兩搖漾西園冠蓋翔綠池  
東第笙簫啟華帳張家舊院倚水陂珠湖千頃漾琉璃  
紅橋碧柳通油幕叢臺複樹繞金羈緋紗籠蠟安花裏  
綵幔懸毬似霞舉漢代名王久愛山曲江吏部今開壑

初開湖墅接湖蓼重起烟樓布烟燎將立星竿火樹枝  
將貯三硝五花爆懸竿貯爆俟斜日列艇分燈晝如漆  
但留幻舞到庭看待駕明河泛槎出斯時濯燕稱最輕  
此際投竿舊有名絙懸傀儡戲東郭鉤藏神祕來西京  
誰翻竹簡弄漁史誰聽皮靴拂絃子巾角彈碁四座驚  
花門蹋鞠三郎喜別有秦箏老朔客曼節長吟變促拍  
何事哀彈塞上聲使予翻動江南情江南一望欲起舞  
前亭又打閭門鼓內部新分刺史家明童盡出諸王府

晚風乍起烟滿湖月輪推湧湖中珠明雲薄霧繞河漢  
蘭橈畫槳環菰蘆燈前紫幔開杯罈水面紅粧照綺疏  
紅粧紫幔兩相映水面燈前看不定明河將月蕩為烟  
皓月連湖瀉成鏡明河皓月乍流沒彷彿天星墮天末  
吹將星簫燎花生看到烟樓火竿發烟樓星簫繞槎轉  
甲燭鱗缸散珠遠祇因畫舫隔烟多翻使紅龍踏波緩  
香燐銀葉炭迸添箭下銅盆滴將滿別浦還營曼衍場  
重城已下歲蕤管大舸小艇歸不歸霜寒月白烟霏霏

吳謳越唱本超絕靜對流波一聲徹繞屋驚翻桂樹烏  
滿船涼浸冰壺月只有傷心小樊素看繫榴裙坐花路  
不識初從何處來幡然忽入烟中去明河垂垂露華澁  
良會何時再能得賦就明河夜未闌皦皦東方又將白

蓬池篇

蓬池渺渺耶溪邊耶溪美人齊種蓮蓮花蓮葉何田田  
風前日下長暄妍東江節度文且賢朝來招我尺素箋  
紅欄屈曲初張筵圓方逋代羞新鮮嬾童皎皎垂帶年

滿堂拂舞愁管弦銀陂倚欄坐欄前宛如身在荷花船  
伊昔蓬池多列仙朱顏綠髮青嬋娟荷珠作珥荷鏡圓  
風衣雨鬟淨可憐今來侑酒真茫然微波著襪飛朝烟  
蓬池如盞酒如泉醉時欲蹋蓬池穿誰聞薌澤碎珠鈿  
晚來灑雨荷花邊

奉贈蔡二爾趾并為訓別

淮陰蔡子嘗負奇鴻名將使侯王知鬣鬣白皙美鬚髮  
有時出語驚人兒我來淮陰問奇士日探懷中襴衡刺

首謁城東蔡子廬恍若長途邁騏驎西風斜日同酒酤  
流霞灼灼抽冰壺汝南黃憲漫相婉只言江左生夷吾  
相從晨夕惜歸去願作浮雲繞江樹秋雨裁飛圯上花  
春冰又滿臨淮渡蔡子驕蹇莫自疑空羣之顧非無期  
黃金築臺久相俟况當冀北長驅馳君不見淮陰故侯  
釣淮水渺渺流波散花蓋一旦能驅西楚王頓挾千金  
散閭里又不見淮王好文作奇句只詠淮南桂之樹後  
園汲水得寒漿白犬丹雞不知處方今蔡子世所聞黥

彭絳濯難同羣只應高語為秦相不羨明堂是漢文

西樵山人歌

馬生自號西樵子家住東湖藕塘裏朝雨看沉屋角雲  
春風吹上堦頭水閒來著書還種花隣園日聽啼慈鴉  
長鑱短鋏置不用自名樵者真浮誇西樵大笑爲我說  
曾夢羊城見高闕青螺壁絕抽紫霞黃木灣深瀉紅雪  
羽衣前度指一山山高與汝同難攀西樵名山亦名爾  
自今爾是西樵子我思南中有奇嶼萬仞羅浮障春霧



夢裏長從嶺徼尋醒來仍在江村住西樵何幸得此名  
此名竟與名山爭騎鯨欲去不得意枕柯將爛非無情  
念爾東湖濱日日放船好隣園有泉亭幽清似瑤島前  
堤採蒲根中流滌蘭草就君長向東湖路時聽流泉不  
能去今來翻作西樵歌恍倚空嵒桂之樹西樵今亦名  
鶴樵薪烟蘇雨當凌霄西山縹緲不可見翱翔爭比他  
山高南還將上匡廬頂看爾西飛一羽毛

放歌為劉二漢中留別

王孫來時桂花發王孫去時春草生問君何以久居此  
只言為有劉生情劉生意氣邁碌碌好我逾于好金玉  
解褐頻酤市酒紅對牀不用霜芻綠我本羈旅人天涯  
任奔走驛店聽曉雞旗亭折秋柳彈鋏辭里門吹簫渡  
江口渡江潛作瀨上行驚翔之鳥傷予心何意君能好  
我摯且深令予忘却蘆中吟朝來共藿糜前廡無用梁  
生炊晚來共紅燭街鼓沉沉倒醺醺一日不見亂心曲祇  
有倪寬相對坐牛角此際驪歌且相樂自此勿言淮水長

濁泥數斗淤難量勿云淮城有千仞當此高懷不堪準  
我今將住劉伶臺寒風斗酒長徘徊不然攀爾桂枝樹  
且與劉安共晨暮無如唧唧鄉井情方春竟逐王孫行  
臨行不識中心苦試看萋萋春草生

渡河寄大敬徽之憲臣并呈張五杉張七梧姜

十七廷梧丁五克振吳二卿禎顧大有孝

河水將流漸東行渡枝津寒風吹襟裾使我思故人故  
人在何所云在舊鄉縣炎天三伏時送我走江甸晝行

蘆中遲夜行瀨上淺三吳舊知子故呼我王彥渡江旅  
集燒燭枝前楹歌發如流絲酒酣銜淚不能下低頭自  
弄黃金卮座中有客向子指此是江東小毛子張祿更  
名識被袍梅生變姓詳居市直前把袂憇疇昔賓客盈  
堂盡前席銀銀駢高瀉傾一時金管豪吹快終夕自此至  
江介車轂日來諗渡江一百日九十就人飲就人飲酒  
可奈何他鄉歲月真蹉跎渡江王彥今仍在曉日寒風  
又渡河

觀滄海歌讀愚山觀海集作

我欲登天孫俯視踏滄海躊躇志不決展卷發愧悔展  
卷忽讀觀海集滄海蒼茫水波溢前開岱嶽捫天關下  
撼洪河蕩奔日魯源村北關里開聖門觀者難為才巴  
西作傳詎仁術田何受易無文裁愚山慷慨董絕學朝  
發魚臺暮姑幕斗柄千年指玉衡龍門萬丈飛銀鰐觀  
于海弄海水只有鴻流亘天起浮雲瀉其中星漢簸其  
裏前臨海嶠自凌躡那用江淮理舟楫青天泛浮槎片

片似落葉浮槎一過海鏡亭還看岫嶺蒼苔青女郎山  
下丹花發驛使詩邊紅淚零獨憐此地李歷下欲倒滄  
溟向天瀉歌成白雪好名樓題却黃金豈無價宣城浩  
蕩不可數自有文章變齊魯渡海何須漢將船驅潮不  
用秦皇弩宣城好我如好璞鼠魄還題卞和玉我知宣  
城知其深滄海滔滔涌陵谷當年刺舟還海中成連既  
逝波濤空今來我亦望洋去隨君觀海乘長風乘長風  
渺以漫但知觀海易不悟為水難奔濤瀕洞震星嶽微

流浩渺揚波瀾我欲從之水潺潺瑯琊並厯下盡作臨  
崖觀不信但觀觀海曲躊躇浩嘆蒼烟寒

陳州村人或賦上陽白髮人者毛甡過聞而感  
焉

河南河北不種麻上陽宮中無好花玉溝流水載花出  
從此宮牆不能入宛丘東路桑落村漂流近在村東園  
黃門持鵝晚歸寂公主望鄉朝負暄西山盜賊走春電  
花落重飛舊巢燕舞鷺翻垂簾宿衣漚麻添作西宮線

金輿入蜀未得歸道傍不用傷蛾眉上陽白髮誰家賦  
能使傍人雙淚垂

食熊蹯口號呈姜黃門

坐我兩水亭飲我五雲館中庖出熊蹯鮮濃滿螺盃青  
梔花發桐樹涼紅魚刺尾游銀塘南風吹吹拂巾袖下  
箸一食神氣揚主人告我是難熟渙釜爍蠟三晝長晉  
侯枉咎宰夫暴老龜須用千年桑

再食熊蹯口號



易牙調苦辛伊尹負鼎俎熊掌亦我欲食之快起舞蹁  
躑舞罷雙淚流鋪藜含藿肝腸羞爭剗夏后兩龍肉未  
厭君夫六駁牛清絲嘈嘈酒滿鐘食熊并食熊蹠崧何  
時借宿長楊館更向山頭一射熊

即席贈安陽許三禮進士南華山莊讌集仝朱  
大士曾沈九嗣范令弟華葉大雷生祝宏坊  
金燾諸孝廉作

鄴城才子東揚客新著單衫棟花白因尋神禹治河經

遂跨秦皇纜船石當年獻賦意氣雄奇文驚動明光宮  
夷門結客滿河朔蘭亭高會來江東炎風六月雨初歇  
澹日熹微障雲葉樓船出郭柳港涼遠聽啼鶯駐輕櫂  
紅箋曾約西曲人油車空返東城闥船牕四啟信流發  
大山小山如錦鱗南華山莊石橋裏句踐傳來照龜址  
叢英茂木深滿園獨立空青一亭子紅蓮落蒂挂石槎  
長竿曲上交藤花清漿凍酒襦瓜李高欄曲檻生雲霞  
過江許掾思如髮魯國朱家髯似麻葉公好龍有奇氣

中酒清譚更超詣杜秋有約恨未來蓮衣水面空相栽  
風流沈郎善吹笛倩我爲歌古惜惜幾番涼氣襲袂生  
一片流雲滿山白江東王謝未易期奉觴疊鼓稱南皮  
菰蘆吳儂一何幸重逢鄴下黃鬚兒藤花初落日初暮  
畫櫂還尋若耶渡漫賦漳河銅雀詞但飲前山照龜處

寶刀歌送姜垚遠行

并序

姜垚公子游晉陽挾寶刀以隨

寶刀千金裝粹若朝芙蓉攜之入晉陽翼翼驚游龍晉

陽古地負朔易簫鼓汾川動春色砥柱峯高竹箭橫天  
門關外楊花白翩翩公子裘馬新幡然願作西都賓奇  
文準擬拔河嶽灝氣直欲凌雲津春風二月固陵渡九  
坂羊腸太行路古署從教倒屣迎前途莫怨班荆暮我  
登君榻裁兩朝夜譚新史傾洪濤徘徊忽綰柳絲別令  
我醉酒心醺醺我不能為雲君已能為龍追君那得隨  
長風去年曾買兩刑劍揚華一辨雌與雄雄者自佩儼  
星列雌以與弟同追鋒今持寶刀漫嘆惜但使揚華似

冰釋從容麾示晉鄭間西去何人不相識

睡石避兵上塢作

毛牲睡石石如馬漂漂水聲走背下豫章葉密風四來  
葉搖隙開日灑灑老人釣水跪雙膝石穿膝穴釣不得  
北山山頂有白雲早歸好避鴉頭軍

浦陽江南五十里仙人嵒與百藥山相對峙毛  
牲登陟之慨然成詠

十三始登山見山如見鬼十五見山久踏之似牛豕仙

人之品對百藥驟見猶然起驚愕魁頭類足何處來頓  
使品前倒行脚當年策彊執神鞭欲驅此品神山前彊  
項不得卒到海仙人就居近有年四圍削琢作門闥轟  
騰煖燐鑪竈濶攢空岵嶸起萬焰燒出丹砂紫花片在  
旁有石類駕鰲前當巨石鰲將逃脩鱗入溪淹鰲足昂  
首綵綵細噴玉或傳此鰲腹虛空仙人產兒坐當中八  
月水枯穴溪底硃旗石竿羅青蔥枯查倒海插石罅千  
年海生石山下祇恐此鰲負品去黑風驟雨駭秋夜楓

橋山人老蓮子曾畫富春山水一日畫得一幅成當  
此一月不得似我今勉強攀天關仙人作歌留樹間何  
前倚樹和歌去西呼茅狗聲斑斑

山有石翁嫗

樸父不死東南隅千年老病無衣裾黃河不清父不死  
却在山前綠蘿裏綠蘿垂垂坐兩石石裏生成有骨格  
世傳老父好此山挈嫗同來作家宅早間洗頭玉女盆  
晚偷鬼火燒松根紅杉紫杪藉衣履乳麕轂雀成兒孫

琵琶灣頭有少女紅裙猩猩對風雨黃姑却上天漢邊  
日盼流黃最心苦老翁宴坐絕朝夕春花滿頭秋月白  
天吳欲牽老嫗去只挽品頭桂枝樹山有翁嫗桂有枝  
羨君婀娜長無知

題倘湖讀書圖爲來十五集之給諫初  
度

倘湖先生讀書處幾疊湖山繞春樹綠檝初爲錦汜游  
隱囊高踞繩牀暮皖江司讞曾守城登陴註易退賊兵



還歸青瑣頓辭去封章十七留筐簾湖山盤盤築書塢  
臨湖幾度清明雨碧柳朝開彭澤樽紅衫夜伴香山舞  
前年居我此湖北檜槳蘭舟蕩瀟瀟月明水靜語有聲  
日上岡寒炙成色先生晨夕湖水濱披圖恍對滄洲春  
羨君原有藍田筆寫出山中唱和人

山霧引

并序

予自江上還避人樓家沓上塢之石橋莊早起觀霧  
初泛絮海中既為霖雨劃然裂響過濡洒而畢則早

食後矣日涉山中境不能悉記寫此寄與舊游故人

用代叙語

山中大霧暗高閣咫尺不辨閣前竹朝光初上欲破難  
蒼茫如在環瀛間頃臾日色拔松頂將破松枝漏光景  
忽聞一響裂萬壑大霧驟歛如雨落我來閣中觀素書  
窗紗几漆疑水濡竹根初青日初出此時已及數竿日  
入山數載恐不深大霧欲破驚人心我將深隱共元豹  
藏入霧中誰得尋

擬古曲聽商生徵說彈琴作

太傅府中銀燭光永恩樓上月輪涼珠徽壁軫甚的皦  
新聲舊韻何悠揚年少商公子彈成夜度娘欲踏園頭  
雙蛺蝶恐驚門左兩鴛鴦

金烏薄栖墮翠林公子披衣拂綺琴梅花調發春月起  
楊柳渡暗暮潮深名姝妖女判不寐聞聲銜恨獨相尋  
子期真善弄田連猶知音

颶颶閣中風脈脈絃上語海鳥汨綠波野鴨翻清渚銅

壺咽流春聲玉馬羈結生夜情手指撥將不終曲心  
想寂寞難為聽春花已靡爛春月又分明莫將卓氏屏  
間意寫作雍門道上行

朱絃七條琴上綵白石一闕口中悲楚妃愁坐久無主  
王昭望鄉不得歸從君一唱復三嘆坐令春草生繁滋  
閉門行

湖南風生湖北涼買酒湖北吹酒香湖中女兒渡湖去  
船頭雙載黃竹箱前湖荷花蔽湖路誰唱蓮舟買荷渡

紅船看入荷葉中欲採荷花恨遲暮明朝伏日須閉門  
莫行荷路傷荷根

草堂花枝詠

有序

避人後七年暫得歸城東草堂睹見花枝爛然不復  
能哭泣乃為之咏

草堂三月花枝紅東風細雨春濛濛夜來燈影動花葉  
照見棲花綠蝴蝶墻東高閣翳紫霞隔墻一樹紅梨花  
隣家少婦捲燈幔坐對梨花起長嘆幼時北里看鞦韆

梨花吹落衣帶前今來拾花種花子是花開碧牆裏

飲祁中丞東書樓同張四梯張五杉姜十七廷

梧蔡五十一仲光觀祁五理孫藏畫書事并

呈祁禮部彥佳姜別駕幹

清江細雨暗遙郭浮雲香靄居上頭銀餅美酒瀉行客  
招我東壁藏書樓樓頭遍插李侯架王軸金籤滿前絳  
嘗餘幃子寫丹青更見屏開舊圖畫滕王蛺蝶銜綠苔  
江都駿馬飛黃埃龍瞳欲點風雨下虎頭落筆滄溟開

憐予畫理本未晰金錯三過頗疑惑張衫同我快指觀  
恍若洪濤盪胸臆于今只愛陳老蓮蘇州待詔吳興錢  
烏程闕思亦超絕君家尚有祁蟬仙我欲雨中摹一幅  
姜九西游賦黃鵠主人便起經且營細拂鵝溪柳條綠  
酒清肉美催飲頻檐前驟雨傾盆鉗畫成相視頓開霽  
生綃捲出秦峰青

寓高家亭子午後黃大世貴蔡二爾趾舒四  
起鳳戴金劉二漢中舒章周麟童衍劉三瑄

移尊過飲率賦兼呈黃二翰樂大六舞高儀

淑光淑

天妃宮南一窪水前有高家小亭子女墻青草環曲沙  
幾疊紅欄傍沙起水光如鏡千頃多風來吹縐波中羅  
波心一徑似裙帶橫橋結束分沿渦橋邊野花夜棲鶴  
此地曾經種靈藥白日昇仙舊得名綠鬟姹女今難索  
我來亭中值夏初菰茨接水生紅魚開欄移榻近沙岸  
沙邊一望真清虛黃梅未過又重五空亭尚對黃梅雨



珠傾艾葉垂碧波血濺榴花墮遙渚良朋好我移酒尊  
烟雲萬疊迷黃昏斜陽暫啟照東壁明霞遠映迴孤墩  
酒酣鐘鼓寺中發野火前堤乍流沒清歌幾曲聲滿湖  
黿吹蛙吟一時歇東湖深處黃氏園鳬亭依倚園東軒  
雨餘嘗就野鳬飲亭中瀟灑誠難言此亭縹緲有奇趣  
亦在南湖最深處良朋四坐皆盡歡恨不同留野鳬住  
清明上巳醉裏過他鄉午日還高歌酒酣起望南湖水  
欲泛輕舟奈雨何


放歌酬王孫晉詒別

東行不得觀滄海策馬復至南昌亭將浮沅湘入衡嶽  
悠然萬壑踰青冥南風五兩泊河渚酒酣日落將揚舲  
忽言欲別王子去中酒起坐醉復醒王子當今一人傑  
少小能文過江薛十五彎弓射浙潮二十裝金返南越  
無端見我喜我狂傲我黛筆書堂堂千秋知己莫過子  
他日青雲藉君爾此間好友倪與劉憐子詩句時追游  
小弟戴金更多事日訓兒童使彊記爭知心雜指爪枯

錯應紛酬總非意那知王子八斗才落筆滔滔等閒視  
君不見毛甡策馬濟上來夜涼獨上韓王臺車裝暫稅  
小亭子亭下週遭蔽泥水朝亦渡水出暮亦渡水入車  
轂不得通褰裳坐相失猶然方幅滿几案蘸墨濡毫日  
揮汗可憐貧賤不自錄役思勞精受人慢逝將西上黃  
鶴樓先遣樊素迴江州仙人天上不可待白雲足下還  
悠悠憑君送我千秋意瀉作舟邊新水流

遣侍兒歸舟江口午日相待

王郎自迎桃葉船我今送汝還江邊水芹如帶曳艇子  
波面晴帆共霞起宜男花發紅滿枝深江莫理絃靴絲  
渡頭喚買豆娘子正是我來江上時



西河集卷一百五十六